

# INUIT ATAQATIGIIT

## INATSISARTUNI



Nuuk, 8. januar 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Sara Olsvig, Inuit Ataqatigiit)

### Apeqqutit:

1. Immikkut siunnersortit pillugit kaajallaasitaq immikkut siunnersortinik atorfinitsitsinermi tamanut ammasumik allagarsiussaqaqqaarnissamik piumasaaqateqarfiunngitsoq atortuulersikkamikku inatsit suna Naalakkersuisut periarfissaliissutitut tunngavigivaat?
2. Immikkut siunnersortit Naalakkersuisuni ilaasortat ataasiakkaat partiiminut attuumassuteqartunut tunngasunik ikiuuffigisinnaagaat Naalakkersuisut aalajangiiffigamikku suna tunngavilersuutigivaat?
3. Ministerip allattuusa immikkullu siunnersortit suliassaasa suna assigiinngisutigivaat?
4. Ministerip allattuusa immikkullu siunnersortit akissarsiaat qanoq nikingasuteqarpat?
5. Kaajallaasitaq malillugu immikkut siunnersortit atorfinitsinneqartut partiimi sulinermut atatillugu ilanngullugu ikiuutaalersinneqarnerisigut partiinut Naalakkersuisuutitaqanngitsunut naleqqiullugit partiit Naalakkersuisuutitaqartut Nunatta Karsiata akiligaanik siunnersorteqarnikkut iluanaarti-taanerulersinneqarnerat Naalakkersuisut qanoq isumaqarfigivaat?
6. Naalakkersuisut isumaqarpat danskit ingerlatseriaasianni immikkut siunnersorteqartoqarneranik apeqqusiinani ilaarsineq nunatsinni pissutsinut Danmarkimut naleqqiullugu Naalakkersuisut tusagassiuutillu akornanni qanimoornerusumik nalinginnaasumik atassuteqartoqarfioreersunut tulluurtuusoq?
7. Immikkut siunnersortit, spindoktorit aamma taaneqartartut, attaveqatigiinnermut tunngasunik suliassaqarajattuusarput aammalu ministerit tusagassiuutillu akornanni attaveqaataasartuullutik. Naalakkersuisut isumaqarpat tusagassiuutit Naalakkersuisullu akornanni allat saniatigut attaveqaateqartoqalernera tamanna pisariaqartinneqartoq, aamma Naalakkersuisut isumaqarpat taamaattoqarnera inuiaqatigiinni kalaallini tulluurtuusoq?

### Tunngavilersuut:

Namminersorlutik Oqartussani atorfilinnik allanik atorfinitsitsinerni atorfimmik allagarsiussaqaqarnikkut inuttassarsiuisarnek piumasaaqataasaraluortoq assignagu immikkut siunnersortinik atorfinitsitsinissamut periarfissiisumik Naalakkersuisut kaajallaasitaliorsimapput. Kaajallaasitaliornikkut Naalakkersuisut tamarmik immikkut siunnersortimik ataatsimik atorfinitsitsinnaatitaalerput, kisiannili Naalakkersuisut Sulittaasuat immikkut siunnersortinik arlalinnik atorfinitsitsinnaatitaalerluni. Kaajallaasitaq malillugu immikkut siunnersortit Naalakkersuisut partiimi sulinermut atatillugu ikiuuffigisinnaavaat taamaasillutillu partiimi sulinermut atatillugu allat saniatigut partiit Naalakkersuisuutitaqartut siunnersortaattut atorneqarsinnaanngorlutik.

Ingerlatseriaaseqarnermi partiit ataasiakkaat naalakkersuinikkut siunnersuinermut atugasani ikittunik aningaasassaqaqarfigisaanni tamanna partiinik Naalakkersuisuutitaqartunik annertuumik iluaqusiisumik equngalersitsivoq. Pingaartumik eqqarsaatigigaanni tamanut ammasumik atorfimmik inuttassarsiuilluni allagarsiussaqaqarnikkut ministerimut allattunik

tusagassiinermilu ataqatigiissaarisunik atorfinitsisisoqarsinnaammat suliassat assingisa ilarpassuunik isumaginnissinnaasunik, partiimut siunnersortitut atuunneq minillugu. Peqatigitillugu immikkut siunnersorteqarneq tusagassiuutit Naalakkersuisullu akornanni ungasinnerulersitsivoq, taamalu aamma innuttaasut nunallu naalakkersuisuisa akornanni. Inuit Ataqatigiit isumaqarpugut tamanna demokratiip atortinneqarnerani ajornartorsiutinngorsinnaasoq, aamma apersuuserujussuarparput Danmarkimi aqqissuussinermik toqqaannartumik ilaarsineq nunatsinnut pissutsinut ilumut tulluartuunersoq. Taamaammat piumasaraarput kaajallaasitaq nutarterneqassasoq aammalu nalinginnaasumik oqallisigineqassasoq immikkut siunnersorteqarnermik aqqissuussineq qanoq ittoq Kalaallit Nunaannut tulluartuunersoq, kiisalu spindoktoreqarnissaq nunatsinni demokrteqarnitsinnut ilumut tulluartuunersoq oqallisigineqassasoq.